



**Broj: 01- /23**  
**Vareš, \_\_\_\_\_ 2023. godine**

**NACRT**

Na osnovu člana 8. stav 3.alineja 37. Zakona o principima lokalne samouprave u Federaciji BiH („Službene novine Federacije BiH“, broj: 49/06 i 51/09), te člana 22. Statuta Općine Vareš (broj: 01-162/12-prečišćeni tekst od 11.09.2012.godine, člana 100. Odluke o izmjenama odluke o komunalnom redu od 29.06.2021.godine broj: 01-127/21, a u vezi sa odredbama Zakona o zaštiti i dobrobiti životinja („Službeni glasnik BiH“, broj:25/09), Zakona o veterinarstvu BiH („Službeni glasnik BiH“, broj:34/02), Zakona o veterinarstvu Federacije BiH (Službene novine Federacije BiH“, broj:46/00) , Zakona o komunalnim djelatnostima („Službene novine ZDK“, broj:17/08), Općinsko vijeće Vareš na \_\_\_\_\_sjednici održanoj dana \_\_\_\_\_.\_\_\_\_\_.2023.godine, d o n o s i:

## **ODLUKU**

**o uslovima i načinu držanja pasa, te načinu postupanja sa napuštenim i izgubljenim psima na području općine Vareš**

## **I OPĆE ODREDBE**

### **Član 1.**

- (1) S ciljem sprečavanja i suzbijanja zaraznih bolesti životinja i zaštite zdravlja životinja i bezbjednosti građana ovom Odlukom propisuje se način i uslovi držanja pasa, registracija i njihovo označavanje te postupanje sa izgubljenim životinjama i osnivanje higijenskog servisa i skloništa za životinje.
- (2) Određene odredbe Odluke ne primjenjuju se na službene pse koje u obavljanju svojih poslova koriste tijela državne uprave i druge pravne osobe (npr. policija, granična služba, zaštitari i sl.), pse osposobljene za pomoć osobama sa posebnim potrebama i invaliditetom (npr. vodiče slijepih i slabovidnih osoba), te pse tartufare i lovačke pse samo za vrijeme lova.
- (3) Stavke navedene Odluke primjenjuju se i na ostale kućne ljubimce koji su definisani Zakonom o zaštiti i dobrobiti životinja.

## Član 2.

Pojedini pojmovi u ovoj Odluci imaju sljedeće značenje:

1. **životinja**-je svaka vrsta životinje koja pripada vrsti domaćih pasa i mačaka;
2. **izgubljena životinja**- je životinja koja je odlutala od vlasnika i on je traži;
3. **napuštena životinja**- je životinja koju je vlasnik svjesno napustio.
4. **opasne životinje** -su životinje koje pokazuju napadačko ponašanje prema čovjeku i mogu ugroziti zdravlje i sigurnost ljudi i životinja;
5. **imalac ili vlasnik životinje**- je svaka pravna ili fizička osoba koja je kao vlasnik odgovorno ili zaduženo lice za životinju dužno da se brine o njenom zdravlju i dobrobiti životinja;
6. **pas lualica** -je svaki pas koji nema vlasnika, koji nije pod kontrolom vlasnika ili ga vlasnik ne sprečava u lutanju, što uključuje napuštene i izgubljene pse;
7. **radne životinje** -su psi koji služe kao tjelesni čuvari i čuvari imovine, psi vodiči slijepih i oni koji služe za pomoć, psi tragači i psi koji služe za obavljanje drugih poslova;
8. **neupisan pas**- pas poznatog ili nepoznatog posjednika koji nije registriran u skladu sa važećim propisima;
9. **sklonište za životinje**- ( u daljnjem tekstu:sklonište) je objekat u kojem se smještaju i zbrinjavaju napuštene i izgubljene životinje gdje im se osigurava potrebna pomoć i moguće udomljavanje;
10. **higijenski servis**- je služba za prikupljanje napuštenih, izgubljenih životinja koji osnivaju pravna lica u skladu sa odredbama ovog zakona;
11. **eutanazija psa** -je poseban način usmrćivanja psa koji isključuje patnju i bol;
12. **ovlaštene veterinarske organizacije**- su veterinarska stanica, veterinarska ambulanta, veterinarska bolnica i veterinarska klinika;

## II USLOVI I NAČIN DRŽANJA PASA

### Član 3.

- (1) Na području općine Vareš članom 100. Odluke o komunalnom redu zabranjeno je držanje životinja u definisanim ulicama gradskog područja, dok je u ostalim dozvoljeno držanje pasa, mačaka, ptica ukoliko se ne ugrožavaju higijenski, sanitarni ili drugi uslovi gradskog prostora.
- (2) Posjednik psa dužan je obezbjediti životinji adekvatan smještaj, neophodnu njegu, pravilnu ishranu, zdravstvenu zaštitu, odgovarajuće higijenske i veterinarsko-zdravstvene uslove prostora u kojem boravi, te obezbjediti da se držanjem životinja ne zagađuje okolina i ne uznemiravaju treća lica.
- (3) Fizičko lice kao posjednik psa, ne može biti mlađe od 18 godina.

### Član 4.

Pas se može držati u sljedećim prostorima:

- u stanu u stambenoj zgradi;
- u porodičnoj kući i dvorištu porodične kuće;
- u dvorištu stambene zgrade, zajedničkom dvorištu porodične kuće i dvorištu sa većim brojem porodičnih kuća u posebnom objektu (kućica ili boks), uz saglasnost svih vlasnika stanova, suvlasnika porodične kuće, odnosno svih vlasnika porodičnih kuća.

### **Član 5.**

- (1) U stambenoj zgradi pas se smije držati samo u dijelu koji pripada posjedniku (privatnom stanu) i to na način da se ne ometa kućni red i mir, te sigurnost ostalih stanara i suvlasnika zgrade.
- (2) Posjednik ne smije ostavljati psa u zajedničkim prostorijama koje služe zgradi kao cjelini (stubišta, ulazi, prostorije za smeće, terase i sl.).
- (3) Držanje pasa u dvorištima zgrada, te kretanje pasa po zajedničkim dijelovima i dvorištima zgrada, kao i čišćenje tih prostorija i prostora od onečišćenja koje napravi pas, zajednički utvrđuju suvlasnici zgrade, predstavnik etažnih vlasnika i upravitelj zgrade.
- (4) U objektima ili zgradama kolektivnog stanovanja nije dozvoljeno držanje pasa na balkonu, terasi ili lođi, te uvođenje pasa u liftove u trenutku kada lift koriste stanari i građani.
- (5) Prilikom korištenja lifta, stepeništa i hodnika stambene zgrade, pas mora biti na povodcu pod neposrednom kontrolom posjednika, te je potrebno da vlasnik psa izvrši čišćenje onečišćenja koje napravi pas.

### **Član 6.**

- (1) Dvorište u smislu odredbi ove Odluke je preostali dio građevinske parcele ograđen ili neograđen, koji pripada stambenoj zgradi, odnosno porodičnoj kući ili većem broju porodičnih kuća.
- (2) Dvorište koje se nalazi uz površinu javne namjene i površinu u javnom korištenju, a u kome se drži pas, mora biti ograđeno.
- (3) Posjednik psa dužan je osigurati njegovo držanje u porodičnoj kući i dvorištu porodične kuće na način na koji se, sukladno propisima o vlasništvu, poštuju prava vlasnika susjednih nekretnina.
- (4) Posjednik psa je dužan da obezbijedi za psa odgovarajući objekat (kućicu ili boks). Objekat za držanje pasa, mora biti udaljen najmanje tri metra od susjedne parcele odnosno od susjednog stambenog objekta.
- (5) Posjednik psa čiji pas učestalim i dugotrajnim lajanjem ili zavijanjem remeti javni red i mir, dužan je odmah poduzeti odgovarajuće mjere kako bi se spriječilo daljnje uznemiravanje ili je dužan ukloniti psa, u skladu sa odredbama Zakona o prekršajima protiv javnog reda i mira, a koji se odnosi na stav o proizvodnji neadekvatne buke.

### **Član 7.**

- (1) Pas koji se drži u neograđenom dvorištu, vrtu ili sličnom zemljištu, mora biti sigurno vezan lancem, na način da ne ometa kretanje i sigurnost građana ili mora biti smješten u boks odnosno kućicu koji će spriječiti nekontrolisano kretanje psa, te osigurati da se životinja neće moći samostalno udaljiti i izaći na javnu površinu bez povodca, zaštitnih sredstava i nadzora.
- (2) Pas se može vezati oko vrata adekvatnom ogrlicom ili kaišem koji se ne usijeca u kožu i koji ne može dovesti do povreda.
- (3) Pas koji se drži u ograđenom dvorištu ili drugom zemljištu ne mora biti vezan ukoliko ograda visinom i čvrstoćom osigurava sigurnost prolaznika i susjeda, a posjednik psa je dužan na vidnom mjestu postaviti tablu sa crtežom i natpisom koji ukazuje i upozorava na prisustvo psa u dvorištu, te mora imati ispravno zvono na ulaznim dvorišnim vratima.

### **Član 8.**

Ako pas nanese povredu ili ošteti nečiju imovinu, posjednik psa je odgovoran za nanesenu povredu, te je dužan i odgovoran izvršiti popravku ili nadoknaditi materijalnu štetu oštećenom fizičkom ili pravnom licu.

### **Član 9.**

- (1) Ukoliko se pojavi zarazna bolest ili znakovi na osnovu kojih se može posumnjati da je pas obolio ili uginuo od zarazne bolesti, posjednik je dužan odmah obavijestiti najbližu veterinarsku organizaciju, te zatvoriti životinju i držati je zatvorenu do veterinarskog pregleda, a nakon pregleda postupati prema naređenim uputama.
- (2) Posjednik psa koji je ugrizao ili povrijedio čovjeka ili izazvao strah kod čovjeka, bez obzira na to da li je ugriz vidljiv ili ne, i bez obzira da li je pas cijepljen ili ne, dužan je o tome odmah obavijestiti veterinarsku organizaciju, a životinju držati zatvorenu do veterinarskog pregleda.
- (3) Prijavu iz stava 2. ovog člana dužan je podnijeti i oštećeni.

### **Član 10.**

Posjednik psa dužan je odmah, a najkasnije u roku od 24 sata, prijaviti uginuće životinje veterinarskoj stanici odnosno veterinaru radi utvrđivanja uzroka uginuća.

### **Član 11.**

Posjednik psa koji se o njemu ne može brinuti dužan je pronaći udomitelja, odnosno fizičko ili pravno lice koje će o njemu brinuti na propisan način ili ga predati skloništu za životinje, te snositi troškove boravka do udomljenja ili drugog načina zbrinjavanja životinje.

### **Član 12.**

Ukoliko se pas zatekne u krugu preduzeća ili drugog pravnog lica, ili naseljenog mjesta i ako ga njihovi radnici ili mještani hrane ili čuvaju duže od tri dana, smatraće se da pas pripada tom pravnom licu ili mještanu, koje je u tom slučaju dužno da se pridržava odredbi ove odluke.

### **Član 13.**

- (1) Posjednik opasnog/potencijalno opasnog psa dužan je životinju držati u skladu sa propisima o zaštiti i dobrobiti životinja, veterinarstvu, zaštiti prirode, javnome redu i miru, te odredbama Pravilnika o držanju opasnih životinja („Službeni glasnik BiH“, broj: 27/10).
- (2) Opasan pas može biti bilo koja jedinka te vrste, porijeklom od bilo koje pasmine koja je ničim izazvana, napala čovjeka i nanijela mu tjelesne ozljede ili ga usmrtila, ničim izazvana napala drugog psa i nanijela mu teške tjelesne ozljede, uzgajana ili dresirana za borbe pasa ili zatečena u organiziranoj borbi s drugim psom, te pas pasmine terijera tipa *bull* koji ne potiče iz uzgoja iz člana 8. stav 1. Pravilnika o držanju opasnih životinja (*pit bull* terijer) i njegovi križanci.
- (3) Činjenicu da je pas opasan utvrđuje veterinarski inspektor ili ovlašteni veterinar, po podnesenoj prijavi o ničim izazvanom napadu na čovjeka s nanesenim tjelesnim ozljedama ili usmrćenjem ili ničim izazvanom napadu na drugu životinju s nanesenim teškim tjelesnim ozljedama.

## **Član 14.**

Zabranjeno je:

- ubiti psa bez opravdanog razloga, nanositi mu bol, patnju ili povredu, mučiti psa i namjerno ga izlagati stresu i strahu;
- držati psa i postupati sa psom na način kojim se ugrožava zdravlje i sigurnost drugih životinja i ljudi;
- zanemarivati psa s obzirom na njegovo zdravlje, smještaj, ishranu i njegu;
- huškati psa na druge životinje ili ljude ili ih dresirati na agresivnost, obučavati psa za borbe, te organizirati borbe pasa;
- napuštati psa ili postupati na način kojim se omogućava bijeg psa;
- dovođenje i napuštanje pasa na područje općine Vareš sa područja drugih općina;
- šišanje pasa na javnim površinama, pojenje pasa na javnim česmama i bunarima namjenjenim za vodosnabdijevanje građana;
- samostalno zbrinjavanje i hranjenje pasa lualica na javnim površinama, u zajedničkim prostorijama i dvorištima i sl.;
- ostavljanje leševa uginulih pasa na javnim površinama, šumskim površinama i kanalima i na poljoprivrednom zemljištu;
- ukopavanje uginulih pasa van mjesta određenog za tu svrhu;

## **III. POPIS, CIJEPLJENJE, REGISTRACIJA I OZNAČAVANJE PASA**

### **Član 15.**

- (1) Posjednik psa je dužan da u skladu sa ovom Odlukom i drugim važećim propisima izvrši cijepljenje/vakcinisanje, registrovanje i označavanje/čipovanje psa.
- (2) Zabranjeno je držati psa koji nije cijepljen/vakcinisan, koji nije upisan u registar/upisnik pasa i koji nije označen/čipovan u skladu sa ovom odlukom i propisima o veterinarstvu.
- (3) Posjednik psa mora imati propisanu službenu ispravu/dokument o upisu/registraciji i čipovanju psa, te vakcinaciji psa protiv bjesnila i obavljenom tretmanu protiv parazita.

### **Član 16.**

- (1) Posjednik psa dužan je voditi brigu o njegovom zdravlju, te psa redovno cijepiti protiv bjesnila i drugih zaraznih bolesti.
- (2) Psi stariji od tri mjeseca moraju jednom godišnje biti cijepljeni protiv bjesnila, s tim da između dva cijepjenja ne smije proteći više od 12 mjeseci.
- (3) Posjednik psa mora omogućiti zaštitno cijepljenje protiv bjesnila psa koji tokom godine navršiti tri mjeseca u roku od 14 dana od dana kada napuni tri mjeseca, a novonabavljenog psa koji nije ranije cijepljen protiv bjesnila, u roku od 14 dana od dana njegove nabavke.
- (4) Troškove i naknade za veterinarsko-zdravstvene preglede, cijepjenja i druge zaštitne mjere snosi posjednik psa.

### **Član 17.**

- (1) Posjednici pasa dužni su registrirati pse u roku od sedam dana od dana sticanja vlasništva, odnosno odjaviti psa u slučaju svakog gubitka posjeda životinje (nestanka, prodaje, darovanja, uginuća i sl.) u roku od sedam dana od nastalog događaja u nadležnoj općinskoj službi te veterinarskoj stanici koja vodi registar pasa.
- (2) Nabavku mladunčeta posjednik mora prijaviti najkasnije do napunjenog četvrtog mjeseca njegove starosti.
- (3) Nadležna općinska služba za upisivanje pasa u registar vodi evidenciju o cijepljenim/vakcinisanim i označenim/čipovanim psima, te izdaje potrebne službene isprave/dokumenta.

### **Član 18.**

- (1) Svi psi koji se nalaze na području općine Vareš moraju biti identifikovani i evidentirani u skladu sa Pravilnikom o identifikaciji i vođenju evidencije pasa, mačaka i pitomih vretica u Bosni i Hercegovini („Službeni glasnik BiH“, broj: 96/16), a za pravovremenu identifikaciju odgovoran je posjednik psa.
- (2) Psi podliježu identifikaciji postavljanjem mikročipa u roku od sedam dana od dana prvog sticanja vlasništva, dok je identifikacija za pse koji ne mijenjaju vlasnika obavezna nakon navršena tri mjeseca starosti, a najkasnije prilikom prvog cijepljenja protiv bjesnila.
- (3) Identifikaciju pasa obavljaju ovlaštene veterinarske organizacije .
- (4) Nije moguće sprovesti bilo kakvu veterinarsku intervenciju ukoliko pas nije prethodno identifikovan mikročipom.
- (5) U svrhu što efikasnije identifikacije i registracije pasa na području općine Vareš nadležna služba će u saradnji sa savjetima MZ izvršiti prikupljanje podataka o broju vlasničkih pasa, te dostaviti nadležnoj veterinarskoj stanici, radi evidencije jedinstvenog registra na području općine.

## **V. KONTROLA RAZMNOŽAVANJA PASA**

### **Član 19.**

- (1) Posjednik psa je dužan osigurati kontrolu razmnožavanja psa, te mora onemogućiti i spriječiti svako nekontrolisano i neplanirano razmnožavanje pasa.
- (2) Prilikom planiranja razmnožavanja psa, posjednik psa je dužan voditi računa o broju potomaka psa radi osiguranja prostornih i drugih uslova držanja u skladu sa propisima o veterinarstvu, zaštiti i dobrobiti životinja, te ovom odlukom.
- (3) Kontrola razmnožavanja pasa provodi se preventivnim djelovanjem, te sterilizacijom ili kastracijom životinje.

## **VI. POSTUPANJE SA NAPUŠTENIM I IZGUBLJENIM PSIMA, TE PSIMA LUTALICAMA**

### **Član 20.**

- (1) Hvatanje, sakupljanje, transport, smještaj i zbrinjavanje napuštenih i izgubljenih pasa, pasa koji se kreću javnom površinom bez nadzora posjednika, te pasa lualica, osiguravaju zaposleni u higijenskom servisu i skloništu za životinje, kojeg u skladu sa Zakonom o zaštiti i dobrobiti životinja, osniva fizičko ili pravno lice, ili općina ili kanton.
- (2) Hvatanje, sakupljanje, transport, smještaj i zbrinjavanje napuštenih i izgubljenih pasa, pasa koji se kreću javnom površinom bez nadzora posjednika, te pasa lualica, obavlja se savremenim metodama, na human način i bez zlostavljanja, uz primjenu odgovarajuće opreme i prevoznih sredstava, a u skladu sa propisima o zaštiti i dobrobiti životinja i veterinarstvu.
- (3) Općina Vareš od 30.03.2021.godine ima zaključen Ugovor broj: 02-686/21 sa Udruženjem za zaštitu životinja „Žučo“ kojim se reguliše privremeno zbrinjavanje pasa lualica do osnivanja tijela iz stava 1.
- (4) Postupanje sa psima smještenim u sklonište (sterilizacija, identifikacija, adekvatan smještaj i ishrana) provodi se u skladu sa Zakonom o zaštiti i dobrobiti životinja, te propisima o radu higijenskog servisa i skloništa za životinje.

### **Član 21.**

- (1) Posjednik izgubljenog psa dužan je skloništu za životinje bez odlaganja prijaviti nestanak životinje, a najkasnije u roku od 48 sati od dana nestanka.
- (2) Ako posjednik psa ne prijavi nestanak iz stava 1. ovog člana, smatra se da je napustio životinju.
- (3) Pronalazač napuštenog ili izgubljenog psa dužan je o nalasku obavijestiti sklonište za životinje, te pružiti životinji odgovarajuću pomoć do vraćanja posjedniku ili do smještanja u sklonište.
- (4) Posjednik napuštenog ili izgubljenog psa dužan je nadoknaditi svaku vrstu štete koju počinu pas od trenutka nestanka ili napuštanja do trenutka vraćanja posjedniku ili odgovarajućeg zbrinjavanja.
- (5) Psi bez posjednika moraju biti primljeni u sklonište, sa osiguranom veterinarskom zaštitom te nakon isteka roka karantene u trajanju od osam dana puštaju se u okoliš iz kojeg su uzeti, shodno članu 29. Zakona o zaštiti i dobrobiti životinja.

### **Član 22.**

- (1) U sklonište za životinje smještaju se psi u skladu sa propisima o zaštiti i dobrobiti životinja i veterinarstvu, i to:
- (2) izgubljeni psi do vraćanja posjedniku;
- (3) napušteni psi kojima se ne može utvrditi posjednik, te psi lualice;
- (4) psi koji se kreću javnim površinama bez nadzora posjednika do vraćanja posjedniku;
- (5) psi kojima posjednik ne može osigurati uvjete držanja u skladu s njihovim potrebama do udomljenja ili drugog načina zbrinjavanja pasa.
- (6) Troškove hvatanja, transporta, smještanja i zbrinjavanja životinja iz stava 1. ovog člana snosi posjednik životinje ukoliko je poznat ili se njegov identitet naknadno utvrdi, a u protivnom

navedeni troškovi se podmiruju iz budžeta općine i drugih izvora finansiranja ( donacije, pokloni).

#### **Član 23.**

- (1) Eutanazija/usmrćivanje psa se provodi u skladu sa odredbama Zakona o zaštiti i dobrobiti životinja.
- (2) Ako se radi o kućnom ljubimcu, troškove eutanazije snosi posjednik, a ako se radi o psima lualicama/napuštenim životinjama troškovi padaju na teret budžeta općine.

#### **Član 25.**

- (1) Općina će u skladu sa važećim propisima koji tretiraju oblast zaštite i dobrobiti životinja, poticati razvoj svijesti građanima o značaju pružanja zaštite i dobrobiti životinja.

### **VII. KAZNENE ODREDBE**

#### **Član 26.**

Novčanom kaznom u iznosu od 500,00 KM do 2.000,00 KM kazniti će se za prekršaj fizičko lice, odnosno pravno lice u iznosu od 2.000,00 KM do 5.000,00 KM ukoliko postupi protivno ili se ne pridržava odredbi članova 3.,4.,5.,6.,7.,8.,9.,10.,11.,12.,17.,18.,20.,23. i 25. odluke,a za čije provođenje je nadležan općinski organ.

Novčanom kaznom definisanom Zakonom o zaštiti i dobrobiti životinja u iznosu od 200,00 KM do 200.000,00 KM kazniti će se fizička i pravna lica ako postupe protivno ili se ne pridržavaju odredbi članova 13.,14.,15.,16.,19.,20.,21.,22 i 23., za čije je provođenje nadležna kantonalna veterinarska inspekcija.

### **VIII. PROVOĐENJE I NADZOR**

#### **Član 27.**

- Provođenje određenih odredbi odluke vrši nadležni organ općine Vareš , dok kantonalna veterinarska inspekcija u skladu sa svojim ovlaštenjima vrši nadzor nad provođenjem odredbi ove odluke , koje su uređene Zakonom o veterinarstvu Federacije BiH („Službene novine Federacije BiH“, broj: 46/00), Zakonom o veterinarstvu BiH ( „Službeni glasnik BiH „,broj: 34/02) i Zakonom o zaštiti i dobrobiti životinja ( „Službeni glasnik BiH „, broj:25/09).
- Policijski službenici MUP Vareš su u granicama svojih ovlasti propisanim Zakonom o javnom redu i miru, Odlukom o javnom redu i miru općine Vareš dužni osigurati pomoć u provođenju Zakona o zaštiti i dobrobiti životinja.
- Poduzimanje mjera za provođenje smatra se hitnim i od posebnog je interesa za općinu Vareš.

#### **Član 28.**

U slučaju kad jedan organ nije ovlašten postupati, bez odlaganja će u pismenoj formi ili usmeno uz sačinjavanje službene zabilješke obavijestiti drugi nadležni organ o saznanjima koje ima.



## **IX. PRIJELAZNE I ZAVRŠNE ODREDBE**

### **Član 29.**

Svi imaoi kućnih ljubimaca na području općine Vareš biti će upoznati sa odredbama ove Odluke, te su dužni njihovo držanje uskladiti sa istom u roku od 60 dana od dana stupanja na snagu ove odluke.

### **Član 30.**

Ova Odluka stupa na snagu osmog dana od dana objavljivanja na oglasnoj tabli općine Vareš.

**PREDSJEDAVAJUĆA  
OPĆINSKOG VIJEĆA**

**Mahira Brkić**

Odluka objavljena na oglasnoj tabli Općine Vareš \_\_\_\_\_ 2023. godine.

**OPĆINSKI NAČELNIK**

**Zdravko Marošević**

## O b r a z l o ž e n j e

### Pravni osnov:

Pravni osnov za donošenje Odluke o uslovima i načinu držanja pasa, te načinu postupanja sa izgubljenim i napuštenim psima sadržan je u odredbama:

- 1. Zakon o principima lokalne samouprave („Službene novine Federacije BiH“, broj: 49/06 i 51/09):** Jedinica lokalne samouprave ima vlastite nadležnosti ustanovljene ustavom i zakonom, i ima pravo baviti se pitanjima od lokalnog značaja koja nisu isključena iz njene nadležnosti, niti dodjeljena u nadležnost neke druge vlasti na osnovu ustava i zakona. U vlastite nadležnosti jedinice lokalne samouprave pored ostalog spada poduzimanje mjera za osiguranje higijene i zdravlja kao i zaštita životinja (**član 8**).
- 2. Statut Općine Vareš (Prečišćeni tekst), broj: 01-162/12 od 11.09.2012. godine:** Općinsko vijeće u okviru svoje nadležnosti donosi odluke i druge opće akte kojima uređuje pitanja iz samoupravnog djelokruga Općine Vareš (**član 22**).
- 3. Odluka o izmjenama odluke o komunalnom redu, broj:01-127/21 od 29.06.2021.godine:** Zabranjeno je držanje životinja u ulicama gradskog područja: Zvijezda, Put Mira, Čaršija, Franjići, Matijevići, Jušići, Benići (oko bivšeg silosa), Novakovići, Nikovac, Selište (do objekta S-I, S-II i S-III), Tirići (do kuće Islamovića), Stojkovići (do Bazena), Glavica (do groblja), Metalska, Majdanska (do objekta "Trokuća"), Perunska i Ljevarska. Izuzetno od predhodnog stava dozvoljeno je držanje pasa, mačaka, ptica i dr. ukrasnih životinja, ukoliko se njihovim držanjem ne ugrožavaju susjedni korisnici stanova i objekata i ukoliko nisu ugroženi higijenski, sanitarni ili drugi uslovi gradskog prostora (**član 100**).
- 4. Zakon o zaštiti i dobrobiti životinja („Službeni glasnik BiH“, broj:25/09):** Sklonište za životinje osniva fizičko ili pravno lice, jedinica lokalne samouprave, općina, grad, kanton ili entitet. Nadležni upravni organ kantona, grada ili općine izdaje dozvolu za formiranje skloništa za životinje, na osnovu uputstva koje propisuje nadležno ministarstvo, a na prijedlog Ureda, te vodi upisnik skloništa za životinje (**član 28.stav 4 i 5**).

Nadležni upravni organ kantona, grada ili općine izdaje dozvolu za formiranje higijenskog servisa za životinje na osnovu uputstva koje propisuje nadležno ministarstvo, a na prijedlog Ureda (**član 29.stav 4**).

Sklonište i higijenski servisi finansiraju se iz budžeta entiteta, kantona, gradova i općina te drugih vidova finansiranja (donacije, pokloni) (**član 30**).

Eutanazija životinja može se sprovesti ako:

- a) se životinja ne može izliječiti;
- b) životinja dostigla visoku starost i otkazuju joj osnovne životne funkcije;
- c) životinje boluju od neizlječive ili zarazne bolesti;
- d) je životinja opasna po okolinu;
- e) je životinja u agoniji.

Za slučajeve pod tačkama a) i b), o usmrćivanju odlučuje imalac životinje, po preporuci veterinara a za slučajeve pod tačkama c), d) i e) odlučuje veterinar (**član 14**).

- 5. Zakon o komunalnim djelatnostima („Službene novine ZDK“, broj: 17/08):** Komunalna djelatnost individualne komunalne potrošnje u smislu ovog zakona je, pored ostalog, i

higijenska, strvoderska i kafilerijska djelatnost. Komunalna djelatnost zajedničke komunalne potrošnje u smislu ovog zakona je pored ostalog i obavljanje kafilerijskih usluga (**član 3**). Pod obavljanjem kafilerijskih usluga podrazumjevaju se poslovi stalnog i sigurnog uklanjanja životinja, pasa lualica, lešina životinja, određenih nusproizvoda sa javnih površina i poslovi eutanazije životinja (**član 4. stav 17**).

6. **Zakon o veterinarstvu BiH („Službeni glasnik BiH“, broj: 34/02):** Imaoci i čuvari životinja imaju obavezu voditi računa o zdravstvenij zaštiti životinja i njihovoj dobrobiti i moraju ažurno voditi registar na imanju. Svako je dužan zaštititi zdravlje životinja, kao i zdravlje ljudi, od bolesti i infekcija, koje se prenose među životinjama i ljudima, kao i od posljedica ostataka štetnih materija u prehrambenim proizvodima (**član 4. stav 1. i 2**).
7. **Zakon o veterinarstvu Federacije BiH („Službene novine FBiH“, broj: 46/00):** Cijepljenje pasa, vođenje evidencije pasa te izdavanje službene isprave o tome vrše veterinarske organizacije. Troškove upisa pasa, obaveznog čipovanja i izdavanja službenih isprava snosi vlasnik životinje. Sadržaj i oblik registra pasa, podaci o obaveznom upisu i provedenim mjerama, kao i oblik obaveznog obilježja za pse jedinstveni su za područje Bosne i Hercegovine (**član 17**).

#### **Razlozi donošenja:**

Na osnovu navedenog pravnog osnova može se konstatovati da su uslovi , način držanja i zaštita kućnih ljubimaca regulisani na različitim nivoima vlasti, u više Zakona i Pravilnika.

S tim u vezi ukazala se potreba za objedinjavanjem svih odredbi koje se odnose na dobrobiti i zaštitu životinja u jedan propis „Odluku o načinu držanja pasa, te način postupanja sa napuštenim psima i izgubljenim psima na području općine Vareš“ čime se jasno definišu nadležnosti vlasti, odgovornosti imalaca pasa te način postupanja sa psima lualicama.

Nakon evidencije i definisanja odgovornosti imalaca pasa u jedinstveni registar, imati će se jasan uvid u broju vlasničkih pasa, uginućima, darovanjima, način kontrole razmnožavanja na osnovu čega će se moći postupati u slučajevima nedovoljne brige vlasnika o psu i odnosa prema životnoj sredini.

Od stupanja na snagu Zakona o zaštiti i dobrobiti životinja nadležnim institucijama je zabranjena eutanazija osim u zakonom određenim slučajevima, što je rezultiralo povećanim brojem pasa lualica na području općine Vareš. Prethodnih godina navedena problematika se djelimično rješavala Ugovorom između Općina Vareš i UG „Žučo“ o privremenom zbrinjavanju pasa lualica .

Do danas na području općine Vareš nije osnovan higijenski servis niti sklonište za životinje, čija izgradnja iziskuje značajna finansijska sredstva.

Psi lualice stvaraju probleme ne samo radi svoje agresivnosti nego i sve većeg razmnožavanja, te migracije pasa iz jedne općine u drugu. Pored ugriza i straha koje izazivaju kod građana to pricinjava materijalne štete na zdravlje ljudi. Također prisustvo velikog broja pasa lualica

uzrokuje znatno onečišćenje okoline i javnih površina. Napuštene životinje mogu biti i prijenosnici zaraznih bolesti na ljude i druge životinje (najdominantnije su zoonoze-bjesnilo).

Kontrolom razmnožavanja (sterilizacija, kastracija) smanjiti će se populacija pasa, smanjiti agresivnost pasa što rezultira manji broj ugriza i napada na čovjeka čime će se moći prevenirati širenje zaraznih bolesti.

### **Financijska sredstva za provođenje odluke**

Za provođenje odluke potrebna su financijska sredstva. Da bi se navedeni problem sistemski rješavao, te eliminisali uzroci koji dovode do pojavljivanja velikog broja pasa lualica, i način zbrinjavanja postojećih predlaže se Općinskom vijeću da usvoji Nacrt Odluke o uslovima i načinu držanja pasa, te načinu postupanja sa napuštenim i izgubljenim psima na području općine Vareš.

**PREDLAGAČ**

**OPĆINSKI NAČELNIK**

**Zdravko Marošević**